

Ngulug nyook so pagoq doomab nyilungv ni mengnam bvrwqsam ceebio baql, bulv Prime Ministaram mwlwngv kaapal cengdwg potangv xeql gigam gab, cenglaq-kaapaqbo dypar ura hoqgv campy leq kiya go ngulug ajin tulungam ‘FIR’ mvnv almadwb mutul appa, hoggab hvbnyiloqkam bulv at-atwg dypar hoqg nyij-mujam bulv nyil doogam agb. Soq sib nyinam sam hima bwwl nyinamv htayin yv? Hvbmab nyiloqkam nyel bikum kongam luusaq yab nyil nyilungam hentwr-kas dvb mvl munyub nandvb yv? Ngul mwlwngv Indiag cenglaq-kaapaqbo dypar urag nyiib nyitwl, ho cenlaqbo nyilub nyitwl, ngulv hoq hvkwl hentwr-kas dvb nyinam benam mam ceebio baqdwn. Ngulv laabo yaab hvraqb nyidwb nyidwn: ngulug ajin tulug Prime Ministerram pota xeqnam gomcwr vxiam ngulv loomin gvdwn. Hoqg bulug pota xeqnam ham ngulv lokta soq so betam gvi nv, hoo ngulv cenglaq-kaapaqbo dypar tulungam, poory-lex mvlaqbo dvparam hoo nyijiq-ngegam belaqbo dypar mwlwngam mvnyi-moiyul bedwn soq bvrwqsam koi-koi yaiyab bisiq-bemeql betam tvka hvl bedwn. Hoqgab ngulv aal looxiam soq pagoq sam vigo bel yvt juka. Pagoq doomab nyilungv ni mengnam bvrwqsam ceebio baqtuj. Nyilungam ccoikab doom dvb agam momtumnam sam ceebio baqtuj. Nyel bikum kongam luusaq yaab nyinwl nyilungam hentwr-kas dvb nyinnam sam ceebio baqtuj. Ngulv, swrsongam abybo la atv Indiag nyi gvsbo mwwnbo tulu ngul, ngulug anyabo nyookso swnyisoolo luusaq-luusaqb kaac-kaaya dvb la hingr-kaaraq dvb nyil mvl doodunam sam vcjaqb mwwdwqdo. Ngulug India gvdag Pvzblo hvl xeqpnamv doodwn ngulug gvdangv secular, socialist, democratic, hoo republic gvdangv hvl bedwn, hoqho mwlwg dormongv, nyob luusaq-luusaqkv hoo nyem-nyegangv hoo dvpar-dvparv hom yin lvkin dvn. Hoqgab ngulug gvdag Pvzbv hiyam-hiyam jaqkam swrsob nyilungam doom dvb ator jinam sam mwwgw layil ngulv soq gaml tulu sam jilwq gvi yin: 1. Muslim nyilungam, Dalit nyilungam hoo asaq-asaq anyo bo nyob dvparam pagoq doomab nyi mengnam sam muturto. Ngulv lamdwg cengpa do NCRB (National Crime Record Bureau) ho pui bekinamv begamv 840 laaleq gob Dalit nyilungam ceebio baql mvnyi-mviyanam mam kaapa pa, hvbmabde hoq mvnyi-mviya bo tulu ham laqm-baqmnamv anyo go kaapa do. Hoq aoho Rajo poolwg 1, 2009 hoqgv naarab layil Lwb poolwg 29, 2018 nagub asaq dormongam ceebio baql bwwdu bwwnamv 254 gob nyido, hoq hoqgv 91 (camleq kiya leq akin) gob nyiingam mengnvba hoo 579 nyiingam uun-tar mvg gvnba (FactChecker.in databse, Lwb poolwg 30, 2018). Nyilug Dormongam Ceebio baql Hima bwwnam mam Kaanbo hoqgv xiqtunamv Muslim nyilungam (14% Indiag hwlw hoqgv) mvnyi-mviyanamv 62% gob nyido, hoo Kristian nyilungam (2% hwlw hoqgv) mvnyi-mviyanamv 14% gob nyido. Hiil poolwg 2014 hoqgv hwdlo noqg Sorkarv gvdangam nyirab gviyik hoqgv kaakanamv odum-apal 90% gob yol-cwcin dul nyilungam mengnam puqnam mam kaapa do. Tuup Prime Ministar, no Parliamentlo begamv asaq-asaq nyob anyo bo dvparam pagoq doomab nyi mengnam sam al looda hvl besdo, hvbmabde hoqhv jotv ma! Hoqhvb nyinbo tulungam no hognvk laqm mam baqm tvbv? Ngulug hangv torum-taxwl mwwdwql bedwn hoqhbv nyinboam pviyw ywwlin nyoma dvb gaml jilinto, hoo hoqham hoggub nyijaqkam kaag-taagnam laqm-baqmnam mam gvda so nyebia jaqkam yuupy mvto. Nyi mengboam pvqtw hoqgv nywywngam tolin maabv, hoo pagoq doomab nyi mengnam boam sinam xaqb pvqtw uraho doomto, hoggab hvbniloqkam pagoq doomab nyi mengnam si mwlwngam nyic nyibin yaanam mai yv? Hoqgab hiyv lajaqkam atwg nyook lo bos sojol swwl doodwb nyila maadwn! Si nyix-riidwb nyinam go “Jai Sri Ram” hvl agam benam si soolo nyob-net pamin sunam hvb nyidul dodo, ho hoqhv vigo vx-axaq gob nyil gvda nyiingam hentwr-kas mvdo, hoo naleqgo pagoq doomab nyiingam mengnamv nyidul dodo. Dormo vmin gab naleqgo yolu-swcin dunam mam ngulv kaapa do! Soq tulu si Lvpa-raag Vnyw ma! Indiag lvvt yaanwg dypar pengko lo Ramwg vminam dvrwqbov hvl mwwdwn. No gvda soqg mwlwngam huqlw bwwbin yaanbov, soq sib Ramwg vminam mucumviya/bicu-beiya mvma dvb no biturto (muturto). 2. Luusaq minsnamv dooma baloqkam hom yin lvkinamv (democracy) doony ram. ‘Gvdangam gummwq

bongv' hvl nyilungam bela ram, ho 'Bopamwg Ceebiong' hvl bela ram, hoo Sorkarram loomin gymab luusaqb mwwnboam vigo pvqtw tumgdo. Indiag Pvvb Haqb 19 lo at-atwg mwwnam mam goolinl goola mvdwb pvvb doodo hoo luusaq-luusaqb mwwl goonamv ngulug gvda so hvvtw poot gob nyidwn. Sorkar mvl doodu gynboam alma hvl benamv atwg nyookam alma hvl bema dvn. Hogloq nyook ho nyilug lvgab huqlwngv doodwn hoqho Sorkar mvl doogbo dparv hom yin maadwn. Hoqh sorkar mvl doogbo dpar ak gontwq. Hoqgab Sorkarram ceekonam si atwg nyookam ceeko dvn hvl bedwb nyila maadwn. Hoqgab rootob mwwb nyiloqkam luusaqluusaqb mwwnboam lvqc koro lo samtin maabv, hvbmabde hoqhv nyookam hwngkwl ator dvb ya mvdwn. Ngulv mwwgwdo ngulug soq mwwl agam goonam hog mwlw sam jvqtw ngvbo hvl noqg hvj-haara hoqgv loorwq yin pv mwwjw dvn – hoggab hvbnyiloqkam ngulv Indiag jvqtw nyiib nyigam gab, hoo soq si al-apaqmab yol-swcin nyinam mam mwwdwqdo, ngulug kuiyum xaqb doody bo nyookam . Translated by Rev. Tar Choya